

րեխօսի դիրքով. դէմքը լուրջ, գլխի շուրջը հասարակ լուսոյ պսակ, իսկ ոտքերին փափուկ մաշիկներ: Յովհաննէս հազել է մինչև բորիկ ոտները հասնող պարեգօտ և ուսերին ձգել նոյնպէս սպիտակ տողայ. գլխի մազերը կարճ կտրուած, անմորուս, բոլորակ նիւթուսով. նա ևս ցաւի արտայայտութեան ոչ մի նշան չունի, բայց մտազբաղ:

Աւելի փոքր դիրքով երկու կողմից մի մի ֆիգուր. աջինը հազել է մինչև ծնկները հասնող, բաց կապտաւուն, թեթեւ տունիկայ, գօտկակապի տեղում քիչ ծալուած, նեղ անդրաւարտիկով, ծնկներից ցած խրած կոշիկի ճիտկի մէջ: Գլուխը վեր է բարձրացրած, մազերը կարճ, առանց նիւթի. երկու ձեռքով նիզակը բարձրացրել է գէպի խաչեցեալի կողք, որտեղից արիւն և ջուր է ցայտում: Ջախ ֆիգուրը նոյն զգեստն ունի, միայն տունիկան մութ գույնի, ոտքի մէկը յետ դրած, ձախ ձեռքին դոյլ, իսկ աջով երկար ձողի գլխին ամրացրած սպունգը բարձրացրած: Խաչելու թեան երկու կողմից բարձրանում է մի մի սրածայր, պայմանական սար, որոնց նմանութիւնը տեսնում ենք և Ժ-ԺԱ. դարի բիւզանդական մանրանկարչութեան մէջ:

Խաչափայտը զարդարուն է սև և սպիտակ շերտերով, վերին թեւը խաչաձևով վերջացած, առանց ցուցանակի. հաստատուած է Գողգոթայի բլրի վերայ, ուր երեւում է և Ագամի գլուխը: Խաչեցեալի թեւերը ձկնաձև են թեթեւ, բեռների տեղերից արիւն է ձորում, իրանը թեքուած է քիչ գէպի աջ, ամօթանքը ծածկուած սպիտակ և նուրբ սփածանելիքով. ոտքերն ուղիղ, իրար կողքի բեռնուած են քառանկիւնի և ակնեցով զարդարուն պատուանդանի վերայ: Աչքերը բաց են, դէմքն ուղղուած գէպի մայրը, կարճ մորուքով, իսկ գլխի մազերը ուսերին իջած, երկճիւղ. բոլորակ նիւթուսը ականազարդ խաչով: Յիսուսի դէմքին ցաւի արտայայտութեան նշան չկայ. աջ կողմից գրուած է. «Ահա որդի քո», իսկ ձախից՝ «Ահա մայր քո», համեմատ Յովհաննու ԺԹ. գլխի: Խաչի հորիզոնական թեւերի վերայ գրուած է «Խաչելութիւն». բոլոր գրութիւններն էլ երկաթագրով: Խաչելութեան հորիզոնական թեւերից վեր, աջ և ձախ կողմից երեւում

են երկու հրեշտակի անդրիններ, սպիտակ տողայով և տունիկայով, դէմքերն ու աչքերը վարմանքի արտայայտութեամբ, իսկ ձեռները երկիւղածութեան, ականջներին լսելիքի, իսկ ճակատին կապի նշաններով, որ յատուկ է բիւզանդական արուեստին ևս: Աւելի բարձր՝ աջից արեգակն է, կարճ ճառագայթներով և կիսադէմ պատկերով, իսկ ձախից լրիւ դէմքով լուսինը, բայց աղօտ ճառագայթներով:

Մեր ցուցադրած այս մանրանկարների մէջ համադրուած ձեակերպութիւնը յարակից է խաչելութեան և խաչից իջեցնելու պատկերադրութեան ամենավաղ ժամանակներից սկսած: Արեգակի և լուսնի երեւոյթը բացառութեամբ Սարնայի դրան և բրիտանական թանգարանի փղոսկրի տախտակի խաչելութեան՝ նկատուած է ամէն տեղ. նոյն իսկ վերջին պատկերի մէջ նկատուած գնդիկները առիթ կարող են տալ ըստ կրօնի կարծելու, թէ արգեօ՞ք արեգակ և լուսին չեն⁽¹⁾: Բարուլայի մանրանկարը, Մոնցայի իւզաշէրի, Ախմիմի ոսկեթերթի, Եգիպտոսի ասեղնեգործի, բրոնզի բուրվառների և այլն խաչելութիւնների մէջ և ապա այնուհետեւ մինչև ԺԳ. դարի վերջերը՝ քիչ բացառութեամբ՝ խաչելութեան կամ խաչից իջեցնելու պատկերադրութիւնների մէջ նկատելի են այդ երկու լուսաւորները, արեգակը աջից և լուսինը ձախից: Նրանց երեւոյթը քրիստոնէական արուեստի մէջ առնուած է ոչ միայն աւետարանական պատմութեան հետեանքով, այլ և հեթանոսական ազդեցութեամբ. ուստի և, երբեմն, երեւան են զալիս իրրեւ անձնաւորեալ պատկերներ կամ հեթանոսական աստուածութիւններ. այսպէս Ե-Զ. դարի սարկոֆագների, Զ-Է. դարի փղոսկրի քանդակազարդ կազմերի վերայ, որոնցից մէկն է և Էջմիածնի յայտնի աւետարանի կազմը, իսկ մանրանկարչական արուեստի մէջ Թ-Ժ. դարի ձեռագիրներում շատ յաճախ⁽²⁾: Ամենից սովորականը մեր մէջ արեգակի և լուսնի բոլորածեւ, խաւարած երեւոյթն է, իբրեւ արտայայտութիւն բնութեան տխրու-

(1) Gesch. der Christ. Kunst. I. 173/4.

(2) Kraus. I. 206. II. 339. Beissel. 248. 300. 314/5. Pokrowski. Xrist. Iskusst. 67. 185 (սլաոկ. 137).